

Бямба гарагийн үдээс хойших хуралдаан

2011 оны 4-р сарын 2

Дур хүсэл

Арванхоёр Төлөөлөгчийн Чуулгын

Ахлагч Даллин Х.Өүкс

Дур хүсэл гэгч хэчнээн чухал болох талаар ярихаар би сонголоо. Бидний хүн нэг бүр өөрсдийгөө юунд дуртай болохыг тодорхойлж, дур хүслээ ач холбогдлоор нь зэрэглэхийн тулд зүрх сэтгэлээ шинжин судална гэдэгт би найдаж байна.

Дур хүсэл бидний эн тэргүүнд эрхэмлэдэг зүйлсийг, эн тэргүүнд эрхэмлэдэг зүйлс маань бидний сонголтуудыг тодорхойлдог бол сонголтууд нь бидний үйлдлийг төлөвшүүлдэг. Бид хэрхэн өөрчлөгдөж байгааг, хэр их амжилтанд хүрч байгааг болон ямархуу хүмүүс болж байгааг бидний дур хүсэл тодорхойлдог.

Эхлээд би нийтлэг тохиолддог зарим дур хүслийн тухай ярья. Бид сонголтууд болон зарим үйлдлийг маань тодорхойлдог бие махбодын хүсэлтэй байдаг. Бид зарим үед аль нэг хүслээ илүү чухал гэж үзсэн өөр нэг хүслээр дардагийг дараах гурван жишээнээс харж болно.

Нэгдүгээрт: Хоол хүнс. Хоолонд дурлах нь бидэнд төрөлхийн заяасан зүйл. Гэвч энэ дур хүслээ илүү хүчтэй хүсэл болох мацаг барих хүслээр дарж болно.

Хоёрдугаарт: Хоргодох байр. Би 12-той хөвгүүн байхдаа ойд шөнийг өнгөрүүлдэг Хөвгүүдийн Скаутын шаардлагыг хангах оргилуун хүсэлтэй байсан учир тохилог майханд унтах хүслээ тэвчиж чадсан юм. Би хэдэн хөвгүүдийн хамт тав тухтай майхнаа орхиод олдсон байгалийн материалуудаар толгой хоргодох оромж барьж, болхидуухан орхийгээд хонож билээ.

Гуравдугаарт: Нойр. Байгалиас заяасан энэхүү хүслийг илүү чухал дур хүслээр түр зуур дарж болдог. Би Ютагийн Үндэсний Гвардид шинэхэн цэрэг байхдаа тулалдааны туршлагатай нэгэн офицерын үлгэр жишээнээс энэ тухай сурсан юм.

Солонгосын дайны эхний саруудад Ютагийн Үндэсний Гвардын Ричфиелд хэмээх хээрийн их бууны суман, цэргийн жинхэнэ албанд дайчлагджээ. Энэ суманг ахмад Рей Кокс командалж байсан бөгөөд 40 орчим мормон эрээс бүрдэж байв. Тэднийг бэлтгэл сургууль хийлгэж, чөлөөнд гарсан бусад цэргүүдээр хүч нэмэгдүүлж, Солонгос уруу явуулав. Тэд хамгийн ширүүн тулалдаануудад оролцсон юм. Тэд нэг тулалдаанд, жагсаалаас гаргасан дайсны хэдэн зуун явган цэргийн дайралтыг няцааж, хээрийн их бууны бусад суманг бут ниргэх ёстой болжээ.

Энэ үйл явдал унтах хүслийг даван туулахтай ямар холбоотой байв аа? Дайсны явган цэрэг тэдний эзэлсэн нутгийн ар талын фронтын шугамыг сэтлэн дайрсан нэгэн шөнө ахмад Кокс холбооны хэрэгслээ майхандаа оруулж, эргэн тойрон харуул гаргаж, байдлыг цаг тутам утсаар илтгэж байхыг тушаасан ажээ. Энэ нь тушаал авсан харуулуудыг сэрүүн байлгаж чадсан бөгөөд ахмад олон удаа сэрэх хэрэгтэй болжээ. “Та үүнийг яаж хийв ээ?” гэж би ахмадаас асуув. Түүний хариулт хүслээ даван туулах хүчийг харуулсан юм. Түүний хариултаас энд эш татъя:

“Бид гэртээ эргэж ирэхэд манай суманд байсан залуусаас хэн нэгэн нь ахмадынхаа алдаанаас болоод гэртээ эргэж ирээгүй бол хотынхоо гудамжинд эцэг эхтэй нь тааралдаад тэдний нүүрийг яаж харах юм бэ?”¹ гэж ахмад хэлсэн юм.

Илүү чухал зүйлийн төлөө хүслээ хазаарлан тэвчихийн ямар агуу жишээ вэ? Энэ бол бусдын сайн сайхан байдлын төлөө хариуцлага хүлээх үлгэр жишээ. Энэ бол эцэг эхчүүд, эмээ өвөө нар, Сүмийн удирдагчид болон багш нарын хувьд даган дуурайх жинтэй үлгэр жишээ мөн.

Шөнөжингөө нойр муутай хоносон ахмад Кокс маргааш өглөө нь эрт цэргүүдээ удирдан дайсны явган цэрэг уруу сөрөг довтолгоонд орсон юм. Тэд хоёр хүнээ шархдуулсан ч дайсны 800 гаруй цэргийг олзлон авсан. Кокс эрэлхэг зоригынхоо төлөө шагнуулж, суман нь онцгой баатарлаг гавьяаныхаа төлөө Ерөнхийлөгчийн Хүндэт Өргөмжлөл хүлээн авсан ажээ. Мөн тэд Хиламаны залуу дайчдын (Алма 57:25–26-г үз) адил бүгдээрээ гэртээ эсэн мэнд эргэж ирсэн юм. Гэвч энэ бол өөр түүх л дээ.²

Дур хүслийн ач холбогдлын талаар олон сургаал Мормоны Номонд байдаг.

Инос Их Эзэнээс олон цаг гуйсны дараа нүгэл нь уучлагдсан. Тэгээд тэр ах дүүсийнхээ аз жаргалын төлөөх “хүслийг мэдэрч эхэлжээ” (Инос 1:9). Тэрээр бичихдээ: “Мөн. . .

залбирч, мөн бүх хүчээрээ чармайн хөдөлмөрлөсний дараа Их Эзэн надад итгэлийн чинь учир, хүслийн чинь дагуу би чамд өгнө хэмээв” (шүлэг 12) гэсэн юм. Амлагдсан адислалд хүргэх 3 чухал нөхцөл болох хүсэл, хөдөлмөр, итгэлийг анхаарна уу.

Алма итгэлийн тухай номлолдоо “итгэх хүслээс илүү нь байхгүй ч гэсэн” бид “энэ хүслийг [өөрсөддөө] хөгжихийг хүссэнээр” (Алма 32:27) итгэл эхэлж болно гэдгийг заажээ.

Хүслийн тухай ялангуяа бидний хамгийн чухал хүсэл юун дээр төвлөрвөл зохих ёстойг номлогч Аароны леменчүүдийн хаанд заасан туршлагаас бид хардаг. Аароны заасан зүйлс хааны сонирхлыг татсан учраас хаан “Мөнх амьдралыг хүлээн авч болохын тулд . . . Бурханаар төрж болохын тулд би юу хийх билээ?” (Алма 22:15) гэж асуув. Аарон хариулсан нь: “Хэрэв та энэ зүйлийг хүсвэл, . . . хэрэв та бүх нүглүүдээ наманчилбал, мөн Бурханы өмнө доош бөхийвөл, мөн та хүлээн авах болно гэдэгтээ найдсаар итгэлтэйгээр түүний нэрийг дуудвал, тэгвэл та хүссэн тэрхүү найдварыг хүлээн авах болно” (шүлэг 16).

Хаан тийнхүү үйлдэж, “Би таныг мэдэхийн тулд . . . мөн эцсийн өдөр аврагдаж болохын тулд бүх нүглүүдээ орхих болно” (шүлэг. 18) хэмээн хүчирхэг залбирал өргөжээ. Тийнхүү өөрийн хүслийг илэрхийлж, амлалт өгснөөр түүний залбирал гайхамшигтайгаар хариулагдсан юм.

Бошиглогч Алма бүх хүнд наманчлалыг тунхаглах агуу хүсэлтэй байсан ч “Шударга Бурхан . . . тэдний хүслийн дагуу тэр нь үхэлд эсвэл амьдралд хүргэх байлаа ч түүнийг нь хүмүүнд зөвшөөрдөг” (Алма 29:4) гэсэн дүгнэлт хийсэн учраас албадлагын хүчийг хүсэх ёсгүй гэдгийг тэр ойлгожээ. Үүнтэй адил Их Эзэн орчин үеийн илчлэлтэнд Тэрбээр “бүх хүмүүнийг ажлуудынх нь дагуу, зүрх сэтгэлийнх нь хүслийн дагуу шүүх болно” (С ба Г 137:9) хэмээн мэдэгджээ.

Мөнхийн Шүүгч энэхүү агуу ач холбогдлыг бидний чинхүү хүсэл дээр төвлөрүүлэхэд бид жинхэнэ ёсоор бэлтгэгдсэн үү?

Олон сударт бидний хүсдэг зүйлийг бидний эрэлхийлдэг зүйлстэй уялдуулан өгүүлсэн байдаг. “Намайг шамдан эрэлхийлэх тэрээр намайг олох болно, мөн орхигдох нь үгүй” (С ба Г 88:83). “Хамгийн шилдэг бэлгүүдийг хичээнгүйлэн эрэлхийл” (С ба Г 46:8).

“Хичээнгүйлэн хайгч тэр олох болно” (1 Нифай 10:19). “Надад ойр байгтун мөн би та нарт ойр байх болно; намайг хичээнгүйлэн эрэлхийлэгтүн мөн та нар намайг олох болно;

асуу тэгвэл та нар хүлээн авах болно; тогш, тэгвэл энэ нь та нарт нээгдэх болно” (С ба Г 88:63).

Мөнхийн зүйлсийг эн тэргүүнд эрхэмлэхийн тулд дур хүслүүдээ өөрчлөх нь амаргүй юм. Бид өмч хөрөнгө, алдар нэр, бардамнал, эрх мэдэл хэмээх дэлхийн зүйлст уруу татагддаг. Бид эдгээр зүйлийг хүсч магадгүй, гэвч эдгээрийг бүх зүйлээс дээгүүрт тавих ёсгүй.

Өмч хөрөнгө олж авахыг хамгийн түрүүнд тавьдаг хүмүүс эд баялгийг шүтэх үзэлд урхидуулдаг. Тэд “баялгийг болон энэ дэлхийн хоосон зүйлсийг бүү эрэлхийл” (Алма 39:14; мөн Иаков 2:18-ыг үз) гэсэн сэрэмжлүүлгийг анхаардаггүй.

Алдар нэр, эрх мэдлийг хүсдэг хүмүүс эрэлхэг зоригт Ахмад Моронайн үлгэр жишээг дагах ёстой. Тэрбээр “захирах хүчний” төлөө эсвээс “дэлхийн нэр төрийн” (Алма 60:36) төлөө үйлчлээгүй юм.

Бид хүслээ хэрхэн хөгжүүлдэг вэ? Арон Ральстонд тохиолдсон явдал ганц нэг хүнд тохиолдож мэднэ. Энэ нь хүслийн тухай үнэтэй сургамж болдог. Ральстониыг Өмнөд Ютад алслагдсан зэлүүд хавцлаар аялж явахад нь 363 кг хүнд хад байрнаасаа гэнэт гулсаж, баруун гарыг нь даржээ. Тэр хаданд хавчуулагдсан гараа сугалж авах гэж таван өдөр ганцаараа тэмцсэн гэнэ. Тэгээд аргаа барж бууж өгөн, үхлээ хүлцэнгүйгээр хүлээх үлдээд байтал 3 настай нэг хүү түүнийг чиглэн гүйж ирэхэд тэр зүүн гар дээрээ хүүг өргөн авч яваа үзэгдлийг харжээ. Ральстон үүнийг ирээдүйн хүүгийнхээ тухай үзэгдэл гэдгийг ойлгоод, хүч тамир нь барагдахаас өмнө амиа аврахаар зориг шулуудав. Хаданд хавчуулагдсан гарынхаа хоёр ясыг хугалж, хутгаар баруун гараа тайрсан аж. Тэгээд хамаг хүчээ шавхан тусламж авахын тулд 8 км газар явган явжээ.⁴ Энэ бол сэтгэлийн зүйрлэшгүй их хүч тэнхээний үлгэр жишээ мөн!

Бидний ихэнхэд нь ийм ер бусын гай зовлон хэзээ ч тохиолдохгүй байж болох ч мөнхийн хувь тавилан өөдөө өсч хөгжихөд бидэнд саад учруулах сорилт бэрхшээл тохиолдож болно. Хэрэв бидний зөв шударга хүсэл хангалттай бат бөх байвал бид мөнхийн өсөлт хөгжилтөд саад учруулдаг донтолт болон бусад гэм нүглийн дарамтаас ангид байж, буруу юмсыг эн тэргүүний эрхэмлэх зүйл болгохоос сэрэмжилж чадна.

Зөв шударга хүсэл нь өнгөцхөн, хөнгөн хуумгай, түр зуурын шинжтэй байх ёсгүй, харин чин сэтгэлийн, гуйвшгүй, байнгын шинжтэй мөн Бошиглогч Иосефын дүрсэлснээр нүгэл үйлдэх аливаа хүслийг бүрмөсөн орхисон байх ёстойг бид санах хэрэгтэй.⁵ Энэ бол нэн хувийн шинжтэй шийдвэр юм. Энэ тухай Ахлагч Нийл А.Максвелл хэлсэн нь:

“Хүн ‘нүгэл үйлдэх хүсэлгүй’ болох гэдэг нь Бурханыг мэдэхийн тулд бүх нүглээ болон буруу хүслээ орхихоор эргэлт буцалтгүй шийдэх явдал юм. . . .

Тиймээс бидний юу хүсэх нь эцсийн эцэст бид ямар хүмүүс болох мөн мөнхийн амьдралд юуг хүлээн авахыг тодорхойлдог.”⁶

Нүгэл үйлдэх аливаа хүслээ орхих нь нэн чухал ч мөнх амьдрал үүнээс илүү ихийг шаарддаг. Бид мөнхийн хувь тавиландаа хүрэхийн төлөө мөнх хүмүүн болоход тавигддаг шаардлагуудыг хангах хүсэлтэй байж, зорилгоо биелүүлэхийн төлөө хичээх ёстой. Жишээ нь: мөнх хүмүүн тэдэнд буруу зүйл хийсэн бүх хүмүүнийг уучилдаг. Тэд бусдын аз жаргалыг өөрсдийнхөөсөө дээгүүрт тавьж, Бурханы бүх хүүхдүүдийг хайрладаг. Хэрэв эдгээр зүйлсийг хийх нь хэтэрхий хэцүү санагдвал дээрх чанаруудыг эзэмшиж, хүсэл бодолдоо Тэнгэрлэг Эцэгийн тусламжийг авахын тулд залбирах хүсэлтэй байх нь эхлэл юм. Бид “түүний Хүү, Есүс Христийн үнэн дагалдагчид бүгдийн дээр түүний цутгасан хайраар дүүргэгдэж болохын төлөө зүрхнийхээ бүхий л эрч хүчээр Эцэгт хандан залбирах ёстойг” (Моронай 7:48) Мормоны Ном бидэнд заадаг билээ.

Эдүгээ гэрлэсэн болон гэрлээгүй бүх эрэгтэй, эмэгтэйчүүдэд онцгой чухал хүслийн тухай сүүлчийн жишээгээр хэлэх үгээ өндөрлөе. Бүх хүмүүс үүрд мөнхийн гэрлэлт хийлгэх хүсэлтэй байж, энэхүү гэрлэлтийн төлөө шаргуу хөдөлмөрлөх ёстой. Ариун сүмд гэрлэсэн хүмүүс энэхүү гэрлэлтээ хамгаалахын төлөө чадах бүхнээ хийх ёстой. Гэрлээгүй хүмүүс ариун сүмд гэрлэх хүсэлтэй байж, үүнийг эн тэргүүнд эрхэмлэх зүйлээ болгох хэрэгтэй. Залуучууд, ганц бие залуу хүмүүс гэрлэх болон үр хүүхэдтэй байхын ач холбогдлыг мушгин гуйвуулдаг, улс төрийн бодлогын хувьд зөв боловч үүрд мөнхийн ач холбогдлынхоо хувьд буруу үзэл баримтлалыг няцаах ёстой.⁷

Ганц бие эрчүүд ээ нэгэн эгчийн захидалдаа хөндсөн дараах асуудлыг эргэцүүлэн бодно уу, тэрээр “Бурханы зөв шударга охид зохистой ханиа зүрх сэтгэлээрээ хайдаг атал харин эрчүүд энэ тухайд харалган болж, бидний Тэнгэрлэг Эцэгийн сор болсон, гайхамшигтай охидыг хайж олон үүрдийн ханиа болгож, Их Эзэний ариун сүмд ариун гэрээнүүд хийж сахих нь тэдний үүрэг хариуцлага мөн эсэх тухайд эргэлздэг болжээ” гэж хэлсэн юм. Тэрээр захианыхаа төгсгөлд: “ХҮГ олон эрэгтэйчүүд болзож, цагийг хамтдаа хөгжилтэй өнгөрүүлэх хүсэлтэй ч эмэгтэй хүнд шийдвэртэй үгээ хэлээд гэрлэх хүсэл тэдэнд огт алга”⁸ гэжээ.

Зарим залуу эмэгтэйчүүд зохистойгоор гэрлэж, үр хүүхэдтэй болох хүслийг ажил мэргэжилтэй болох болон мөнх бус амьдралын бусад хүсэл сонирхлоос доогуурт тавьдаг

гэдгийг хэлээсэй хэмээн мөнхийн ханиа хайж байгаа зарим залуу эрчүүд надаас хүсч байгаа гэдэгт итгэлтэй байна. Эрэгтэйчүүд, эмэгтэйчүүд аль алинд нь мөнх амьдрал уруу хөтлөгч зөв шударга хүсэл хэрэгтэй.

Дур хүсэл бидний эн тэргүүнд эрхэмлэдэг зүйлсийг, эн тэргүүнд эрхэмлэдэг зүйлс маань бидний сонголтуудыг төлөвшүүлдэг бол сонголтууд нь бидний үйлдлийг тодорхойлдог гэдгийг санацгаая. Түүнээс гадна бид ямар хүмүүс болохыг, үнэнч найз, авьяаслаг багш эсвэл мөнх амьдралд тэнцэх хүн үү гэдгийг бидний үйлдэл, хүсэл таашаал тодорхойлдог.

Бүхнийг боломжтой болгосон Есүс Христ, Түүний хайр, сургаал болон цагаатгалын тухай би гэрчилж байна. Бид Түүнийг болон Түүний баяслын бүрэн дүүрнийг бусад бүх зүйлээс илүү ихээр хүсдэг байхын төлөө би залбирч байна. Есүс Христийн нэрээр, амен.

Эшлэл

1. Рей Кокстой Ютагийн Моунт Плезантад хийсэн ярилцлагын хувийн тэмдэглэлээс, 1985 оны 8-р сарын 1, 1953 оны орчим Ютагийн Провод түүний тэмдэглэл надад ирсэн юм.
2. Richard C. Roberts, *Legacy, The History of the Utah National Guard* (2003), 307–14-ийг үз (Ютагийн Үндэсний Гвардийн Холбоо, 2003); *The National Guardsman* (уг сэтгүүлийн 1971 оны 5-р сарын дугаарын ар талыг үз); “Miracle at Kap Yong: The Story of the 213th” (Southern Utah University уг киног гаргажээ, 2002).
3. Aron Ralston, *Between a Rock and a Hard Place* (Нью-Йорк, Atria Books, 2004)-ийг үз.
4. Арон Ральстон, *Between a Rock and a Hard Place*, 248-ыг үз.
5. *Teachings of the Presidents of the Church, Joseph Smith* (2007), 51-ийг үз.
6. Нийл А.Максвелл, “According to the Desire of Our Hearts,” *Ensign*, 1996 оны 11-р сар, 21-22
7. Жюли Б.Бек, “Teaching the Doctrine of the Family,” *Liahona and Ensign*, 2011 оны 3-р сар, 12–17-г үз.
8. 2006 оны 9-р сарын 14-ний өдрийн захидал.

Лиахона

2011 оны 5-р сар